

L bala l cunsëi nuef

La Grupa de bal populer Sëlva – S. Cristina à lità l cunsëi nuef ntan la senteda generela n sada ai 13 de dezèmber te si local dala proes . Andreas Comploi de Sëlva ie l presidënt nuef

Lies - Do che l presidënt da dant Martin Zingerle à cuntà dl'ativiteies dl ann y dla nuviteies dal raion dla grupes de bal, à Andreas Insam fat n pitl ressumé dla festa di 25 che ie stata de setèmber. Stefanie Runggaldier à liet dant i muvimënc de cassa dl ann 2008. Paroles de saluc y lauda nes ie unii purtei persunalmenter dal ambolt de Sëlva Roland Demetz. Per l ann 2009 ie l program bel drët plën de

aparizions. Per l instà che vën uelen ti mustré al publich n bal nuef, l «Tiroler Figurenlandler». Dan la veles dl cunsëi nuef iel unì pruietà mo sun na gran tofla la beliscima fotos fates da d'ansciuda sun Daunëi y a Roma ntan l viac. Duta la plu bela fotografies ie sambën da udëi tla bela plata internet dla grupa www.volkstanzgruppe.org. Da udëi ie nce la bela fotografies fates ntan la tlecanocht, usanza

che la lia porta inant bel cater ani alalongia, coche la univa bele cianteda ti ani 50 cun duta si figures urigineles. Ala fin dla sëira à Martin Zingerle dat ju si ncëria da presidënt. L ie pona stat la vela dl cunsëi nuef. Presidënt dla grupa ie diventà Andreas Comploi de Sëlva, vizepresidënt ie unì lità Andreas Delago. Maester de bal cun 16 stimes sun 17 ie diventà Matthias Weithaler de S. Cristina.

I autri cumëmbri dl cunsëi ie Andreas Insam, respunsabl per l local y la plata internet, Anna Demetz se cruzia inant dla trohtes y di guanc, Christine Delazer ie la scrivana nueva dla lia y Martin Zingerle sarà cassier y vizemaester da bal. N gran rengraziamënt ti va sambën a nosc sunadëur Diego Colleselli da Colfosch, che fej sën d'inviern na raida longia, de belau 200km!, per fé pea pra l'ativiteies

dla grupa.

N gran "Dievelpaie" a duc i cumëmbri dl cunsëi da dant per si bon lëur fat ti ultimi doi ani per la grupa, Stefanie Runggaldier, Luca Comploi y Alexia Demez. Cun l'ucajion ulons ti mbincë a duta la jënt de bona Festes da Nadel y n Bon Ann Nuef.

*Per la grupa da bal,
Andreas Delago*



L cunsëi nuef dla Grupa de bal populer Sëlva – S. Cristina.



I balarins sun Juac.